

193 897

QUÆSTIO MEDICA

QUODLIBETARIIS DISPUTATIONIBUS

MANE DISCUTIENDA

IN SCHOLIS MEDICORUM.

Die Jovis 14. Decembris.

M. PETRO YVELIN

DOCTORE MEDICO, PRÆSIDE.

An sanguis utilius mittitur primo quam medio graviditatis tempore?

I.

QUONIAM olim novum fuit, nunc vetus est in gravidis mulieribus venam incidere absque ullo abortus periculo, qui antea metuebatur, nec sine aliqua veri specie, si sanguis ea largitate semel funderetur, quæ mulieris prægnantis vires omnino exhauriret. Verum hujus humoris partitè mittendi ratio, rem præstat longè securiorem. Deinde pleraque sunt quæ semel aut rarius visa, non debuerunt præcepto tradi, observatione potuerunt, nec usu excoli. Atque adeò hoc auxilii genus, in pueris infantibusque utiliter experimur artis sapientiâ sapientum quorundam auctoritati antepositâ. Quasi venæ sectionem imperantis consilium eò potissimum dirigi debeat, ut non quæ ætas sit, neque quid in corpore intus geratur, sed quæ vires sint peritè intelligat, ex eis collecturus, possit necne superesse sanguis qui in una muliere duo corpora simul sustineat. Omnique graviditatis tempore vena tutò secabitur, tum verò tutissimè, cum præsentia indicantis affectus magis urgebit; quippe cujus est intentionem medici atque prudentiam regere in secunda æque ac adversa valetudine; neque enim graviditas morborum numero adscribenda est; aut neutri cuidam statui, qui nullibi consistit inter contrariam morbo sanitatem. Hæc ut fuerit in prima aut ultima ætate imbecillior, in media vegetior; si tamen abest injuria functionum, huic aut illi hominum generi debitum, morbus quoque abest. Nec etiam gravidæ mulieris ea deest sanitatis virtus, quæ audacissimo corporis muneri satisfaciat; nisi tunc natura, quasi avaritiæ conscia, se forsan inopem senserit ex nimia suarum divitiarum copiâ; quæ ei, non secus ac avaritiæ sua bona, oneri futuræ sunt & inutiles, immò vero, novæ, statim atque sanguis congruentem corpori modum magis excefferit.

VENÆ sectio princeps & palmarium suo merito audit remedium, utrique hominum statui, ægro & salubri pariter propositum. Adeo diversis modis immutat corpus, ceu morbus præcaveri, ceu curari debeat, ut nec ab uno indicante, nec certò definiri possit, inter tot indicantium genera, ab utro magis indicetur. Nimiam, quæ morbum minatur, sanguinis copiam vacuat; pravam, quæ eundem facit, qualitatem temperat: præcipitem in alienas partes humorem revocat, & effusum ad vicinas derivat; unde nec uni corporis vitio succurrit, nec uni medendi scopo responderet. Tot deinde affectuum mensura & sedes, quasi artis consilio & invitatione, præbunt ad sanguinis mittendi, non secus ac remedii cuiusvis, ex indicationis lege, præscribendi copiam & locum designandum. Attamen principis præsidii occasio tum præsertim se offeret, cum nova aut major quædam pernicies à cumulatioris sanguine sanitari imminebit. Quamobrem Athletarum corpus hæc veluti redundantis succi sarcinâ statim expediendum fuit, eo valetudinis & roboris tempore, quo urgentibus morborum periculis, propius objiciebatur. Nimius enim sanguis moræ impatiens, quoquo versum sese effundit, neque modo genis ruborem, capiti oculisque gravitatem infert, aut toti corpori plenioris molem, sed quatenus huic vel illi excremento magis affinis existit, longe alia partibus internis, vel externis creat aut pollicetur mala. Sin minus qua parte soler purus vel impurus erumpere, naribus, hæmorrhoidibus, utero, ad eandem pristino motu se refert; tum verò magis si ulla naturæ præscriptione eò inclinât, ut mensum specie copiosius irrumpentium, admirabilem uteri conatum inturbet, divinam fœtus texturam facilius obruat, suffocetque primo quam medio graviditatis tempore.

III.

TOTA graviditas (quæ muliebris corporis est dispositio, quâ fœtus utero continetur, diu gestatur,) numeratur ab eo tempore quo uterus semen arctè complexus est, usque dum fœtus effluxu, abortu excludatur, aut legitimo partu brutis animalibus præstituto, rationis participibus vario; ut ne certiora essent momenta hominis ex utero exituri in lucem, quam signa concepti, quandiu motus indicio nondum consistantur. Ridendæ igitur mulierculæ quæ etiam hoc vel illo mense, longe audaciùs quam sapientes quique, pronunciant, quidquid de muliere rogabuntur. An utero gerat? An jamdii? Quis sexus fœtum distinguit? Et quod erit ei nascendi tempus? Quorum omnium certa cognitio vix ad medicorum animos statim pervenit, nedum ad obstetricum digitos, sed uni naturæ reservatur; Non summum modo naturæ opificem, aut nativum matris calorem, verum hanc intelligo (quæ artis jam interest) incredibilem efficacitatem seminis paterni: aut, quod idem est, calidi nativi, à virili quidem semine, aliquo nominis & officii modo, neque naturâ discrepantis: nempe à quo intra uterum tota pendet, ex sanguine materno, hominis delineatio, necnon nutritio, cæteræque ejusdem functiones, dum proprio sanguine extra uterum vivit. Quemadmodum autem prægnantis mulieris imaginatio, effigiem, sic varia seminis conditio speciei similitudinem fœtui imprimit; varia quoque in

3

eodem ratio caloris, varium describit sexum; ac deinde una ejus virtus aut imbecillitas, conformatum in utero corpus, alio atque alio tempore movet, extra uteri latebras promovet, & excludit, septimo, nono, decimo vel alio mense præter expectationem sæpè nasciturum. Quæ de re si nemo possit numeros ullos tentare, vel babylonios; quam fallax erit ad tunden-
dam venam, mediæ graviditatis conjectura! cui vulgus (in quo non est ratio nec consilium) quartum mensem cum dimidio certa religione præfinit. Quasi nullus esset, nisi nono mense natalis dies; aut conceptionis primordia adeò constarent. Attamen si ulla est sapientum prudentia vulgi opinioni servire in hac tanta humanæ fabricationis caligine; primum graviditatis tempus metiemur primâ quâque oneris utero suscepti suspitione, & eâ quæ ex suppressâ mensium consuetudine magis ac magis invalescet. Unde nemo non intelliget; tum securiorem utilioremque dari venæ sectioni locum, quo majus periculum, velut latenti in semine homunculo, residet in inutili & noxiâ tam copiosi sanguinis redundantia, quæ in gravidarum mulierum venis, visceribus, utero retinebitur ad sætum omnino corrumpendum, sætam pluribus malis cumulandam.

IV.

NIMIRUM sanæ mulieres quæ suo sæcunditatis curriculo neque lactant neque uterum ferunt; eæ sanguinis jacturam patiuntur singulis mensibus ad heminas plus minus duas. En multa fœtus materia, quæ longè imparibus vitibus tractanda, pauculo semini proponitur; id quidem uteri sinu susceptum, velut artificio naturæ agro fovetur, & circumfusi sensim sine sensu è proximis venis admittit quam exilissimam sanguinei roris tenuitatem; quæ tertio die principem corporis partem (saliente punctulo) designat in pullo, quidni & in homine, qui etiam trigésimo quadragésime conceptionis die, bellè conformatus, nequidem pullo, vix formicæ aut Api æqualis inventus est à naturæ Mystagogis. Quorsum igitur tanta humoris quasi annona, nisi ut hominis semen, plantarum femine longè delicatius, in uvidiori loco statim extinguatur per sanguinis è cubito minuendi incuriam. Cujus semper pœnitebit eum, pudebitque qui primo graviditatis tempore, nonnumquam in mulieribus deprehendet solitas periodos mensium, tum magnâ fœtus conservandi providentiâ, adhuc recurrentium, tum majore artis documento. Esto enim uberius alimentum, grandiori fœtui quasi necessarium concedatur, quod suis membranis involuto corpori, suis quoque numeris absoluto satis sit ad vasa umbilicalia, placentam & adeò numerosam partium suppellectilem, toto auctoris tempore, magis ac magis locupletandam à quadragésimo circiter die, usque ad legitimam exclusionis horam. Verùm quid est, quod primis, constituendi fœtus, quasi momenti, trepidas, hæmophobe, vulgi opinione magis quam legitimâ indicatione ductus, quæ tunc sanguinis missionem suadet cum natura paucissimi eger & copiosiori redundat.

V.

NATURA igitur in fingendo fœtu materiæ parcissima, ni succurras, luctabitur cum nimio sanguine, & ab eo primis graviditatis tem-

poribus, vim est passura. Huic quidem blandius affluenti amicè interest ac præst; sed vehementius irruenti primum reluctatur, tum ei se immiscet, incerta tamen quo spectet dubius spirituum vigor; mox sæpè in eo rerum discrimine, ab homine fabricando penitens repulsa, ad informem alicujus corporis umbram se convertit, ceu ad gignendam, ex tanta humoris mole, Molam, quæ fœtus æmula novarum nuptarum gaudio sæpe illudit; venæ sectionis negligentiam medicis sæpius exprobravit; fere nunquam utero elapsa quin aliqua sanguinis profusio, exeuntem sequatur aut antecedit. Porro si integra manet feminis virtus, tot superatis perficiendi hominis impedimentis; quanta deinde mala luxurians sanguis, gravidæ pariturus est ad patentia & bibula viscera ex utero revocatus. Quæ ratione hepar, Lienem, singulasque partes prægravabit, & inficiet, hæc eadem appetentiam deciet & depravabit; nauseam vomitumque ciebit; ventrem diarrhæa aperiet; acriori subter fluentium humorum stimulo irritabit uterum; thoracem spirandi & tussendi difficultate premet, capitis dentiumque dolorem faciet; eripiet somnum, aut quasi veterno obruet corpus, languore dissolvit, inediâ penè exsiccat & consumet: ita ut prægnans mulier, solâ assiduitate cibi sursum deorsumque rejiciendi, & penuriâ confecti, adducatur ad eam humoris mediocritatem quæ, sectis, ineunte graviditate, superioribus venis, procurata, tot vivendi labores longè propulisset, & cum omnino providisset (nec adeo tenuis valetudinis statum) qui deinceps quarto aut quinto conceptionis mense, magis vigere incipit, venis suo sanguine non amplius turgidulis. Ideoque certius conjicitur præteritum esse omne non modo effluxus aut abortus, verum etiam morbi periculum, cui tempestiva venæ sectio longè securius occurrisset.

Ergo sanguis utilius mittitur primo quam medio graviditatis tempore?

DOMINI DOCTORES DISPUTATURI.

M. Ioannes Robert.

M. Claudius Puyton.

M. Franciscus de la Chambre, Regis
Medicus ordinarius, & Regina Fran-
corum primarius.

M. Ludovicus Gayant.

M. Petrus Yvelin, Praefes.

M. Alanus Lamy.

M. Franciscus Vexon.

M. Raymundus Vaslet.

M. Claudius Quartier.

Proponebat Lutetiæ NICOLAUS RAVEAU,
Villonixus, A.R.S.H. MDCLXXIII.

P A R I S I I S,
Ex Typographiâ FRANCISCI MUGUET, Regis ac Illustriss.
Archiepiscopi Typographi.